

Jahresbericht Frauengemeinschaft GV 2025

Mier chömed somit zum Jahresbricht vo de Frauegmeinschaft.

is nüe Programm gstartet simmer im Februar ganz währschaft

So hemmer en asiatische Chochkurs gmacht

Für de sind grad ganz viel Amäldige inekracht

Obwohl mier spontan grad no en zweite Kurs tüend organisierä

Hend trotzdem nid all, wo hätted wellä, Asiatisch chönnä probierä

Ändi März hemmer üs am nä Abig ufem Dorfplatz troffe

Und sind denn zäme gmüetlich ums Fäld ume gloffe

Mit denä verbrännte Kalorie simmer aber nid lang im Minus gsii

Diä hemmer üs bim Maurizio grad wieder agässe mit Pizza und Wii

bsunders viel Adrang hed dä Handletteringkurs im April gha

da hänke mer doch au grad no en zweite Kurs drah

Au der isch innert kurzer Frist grad voll

Und gfalle hed er allne Fraue ganz toll

Glehrt hemmer uf nüi Art schön zschriebä

Da isch sicher a jederä Teilnehmerin öbbis hange bliebä

Au dChind hend hür äs Kürsli dörfä bsuechä

So sinds ufemnä Spaziergang Bluemä und Chrüüter go suechä

dDesirée hed verzellt, was mer us Wildchrüter alles cha mache

Wildchrütertee hed sie kocht und sogar Muffins hed sie üs demit bache

Efeu isch zum Biespiel au als Seifi zum wösche ideal

Oder probiered doch Wiesälabchrut i üchem Tee e Mal.

Us Wildchrüter gits gar mängi Sache z'chochä.

Länger verwände chan mers, wenn mes tuet trochnä.

Im Juni sind paar Fraue, teils in Schaare
Mit Auto oder Bus is Kino uf Schwyz überä gfährä
Det hemmer en feine Apéro mit Wii und Brötli gnosse
Bim Film isch denn näbe Glächter au s'eint oder ander Tränli gflossä
Dä Film „Wunderschöner“ isch halt läbensnah
Hend öbbe all so Szenä im ächte Läbe scho gha

Kreativ simmer im 25i au no gsie
Bim Herbstchranz bindä sind au grad es Paar debii
dAmina hed üs geduldig is Chranzflächte igfühert
wiä mer diä Bluemä und Ästli richtig aschnüert
dUswahl a gschnittnä Blüetä und Äst isch riesig
sogar sälbergmächti Knabbereie hed sie für üs gmacht, diä Flissig
Am Schluss hend all gägesiitig dChränz no chönne bestuunä
So simmer hei mit bester Luunä

Mitti September simmer Richtig Ämmital
Hend dänkt a diä berühmti Dahlieschau gömmer au emal
Aber wo mer denn nachemä Umweg achömed bi dä Gärtnerii
Ja, wo sind denn all diä schönä Dahlie hiii?
Heds doch us Erzählige und uf Föteli prächtiger usgseh
So gömmer ämel siiicher niehmeh.
Guet gsii isch aber sZmittag und sKafi oder dSchalä
Au wenn mer bim Fräulein, au nach langem wartä, no nid hend chönnä zahlä
Hends nach em WC-Gang doch no all in Car inegschafft
Hemmer üs wiiter uf Truebschache id Kambly ufgmacht
Det hend sich all dä Buch chönnä mit Chräpfli vollschlah
Also ich ha dernah sicher keis Znacht meh müessä ha.

Das Jahr simmer a dä Chilbi i dä Bogästübä am schaffä
Tüend dStunde zäme mit dä Musig abraffä
Vo üs Fraue hälfed a de Zahl öbbe 50i mit
Und dlnahme sind dur üche grossartig Isatz denn au der Hit.
Ighnoh a Gwünn hemmer nämmlü über 8000 Frankä
Dafür möchtet mier allnä Friiwilligä vo Härze dankä

Im Oktober wär no en Selbstverteidigungskurs agseit
Der hed dä Kursleiter müessä absäge, das tuet üs Leid

A dä Elisabethäfiir Im November simmer zersch id Chilä
Und nah für Kaffee und Kuchen is Kaplanehuus inä
Ganzi 17 Nüümitglieder dörfäd mier zellä
Die hend denn en Rosä dehei dörfä id Vasä stellä

Im November hend no paar am Schmuckkurs teilgho
De hed für Aklang gsorgt, das isch e so
All hend chönne machä es eignigs Schmuckstück
Das bringt ine jetzt hoffentlich chli Glück

Ganz schön wiehnachtlich ischs Ändi November wordä
Am Wiehnachtsmärcht isch gsii ä Mänschehordä
Das der zStand cho isch, isch zersch no i dä Stärne gstandä
Hemmer nach dä Reservation müessä uf de Nasä landä
Nach em nä Intermezzo wäg dä agstiegnä Mietchöschtä mit dä Gmeind
Wends doch nid sii dä Steiner Vereinä irä Feind
So länkets nach Isprach vom VSV doch no ii
Das mier schlussendlich chönd i dä schwarze Zahlä sii.
Mier danked au hiä hätzlich i dem Sinne
allnä Hälfer und natürlich au dä Chuechäbäckerinnä

Wer zSteinä äs Baby überchund, für diä gits es chliises Gschänk

A dä Frauä mues das aber au no öbber bringä, dänk

Babybsüechli sinds ganzi 36 gsi a dä Zahl

Dankä vielmal Nicole, machsch du das fasch jedes Mal

Im Verein hemmer au ganz viel Alleinstehendi

Au bi denä isch öbber Friiwilligs verbii

D'Irene üsi gueti Seel mit irnä Verträgerinnä

Hend zäme dörfe ganzi 78 Gschänkli bringä

So ich höre etz uf üch vollschnurrä

Nid dass er no afangäd umemurrä

dSandra verzellt etz no öbbis über dFinanzä

und git üs en Überblick über das Ganzä